

A 1897/tillväxt

Flytjandi	Flokkahópur hægrimanna
Afgreiðsla	Norræna hagvaxtar- og þróunarnefndin

**Þingmannatillaga
um rafrænan vettvang fyrir greiðslur innanlands og milli Norðurlandanna****Tillaga**

Flokkahópur hægrimanna leggur til að

Norðurlandaráð beini þeim tilmælum til Norrænu ráðherranefndarinnar

að vinna að sameiginlegu rafrænu greiðslukerfi á Norðurlöndum;

að vinna að því að öll Norðurlöndin styðji hugmyndina um sameiginlegt rafrænt greiðslukerfi í löndunum;

að stuðla að aukinni samstöðu að því er varðar framkvæmd eftirlits á markaði fyrir greiðsluþjónustu á Norðurlöndum.

Bakgrunnur

Við viljum að Norðurlönd verði samþætt svæði á heimsmælikvarða. Þessu er oft lýst yfir í umræðum og hátíðarræðum sem fjalla um norrænt samstarf. Um það eru allir á eitt sáttir þvert á pólitískar skoðanir.

Vel samþætt Norðurlönd fela í sér að við getum búið, farið ferða okkar, stundað nám og vinnu og viðskipti á öllum Norðurlöndunum án þess að þurfa að velta fyrir okkur hvoru megin landamæranna við erum. Í heimsfaraldrinum hefur norrænt samstarf orðið illa úti. Landamærin voru ekki lengur opin, búseta í einu landi og vinna í öðru gekk brösuglega fyrir sig, ferðalög til að heilsa upp á fjölskyldu og vini í grannríki urðu nánast ómöguleg. Við sjáum því miður að áhrif heimsfaraldursins drógu verulega úr hugmyndinni um samþætt svæði á heimsmælikvarða.

Á meðan á heimsfaraldrinum stóð kviknuðu hins vegar einnig hugmyndir um hvernig megi þróa norrænt samstarf áfram. Stafvæðing í löndunum er langt á veg komin og þróaðist frekar þegar við gátum ekki lengur hist í eigin persónu. Rafrænir fundir urðu fyrir marga eini möguleikinn til að stunda vinnu og halda sambandi við fjölskyldu og vini. Samfélag án peninga festist enn frekar í sessi og í dag er sjálfsagðara að borga með símanum en að borga með reiðufé.

Rafrænar greiðslulausnir eru þegar til staðar á öllum Norðurlöndunum. Í Svíþjóð er



notast við rafrænu greiðsluþjónustuna Swish, í Noregi er það Vipps og í Danmörku MobilePay. Vandamálið er að þessi kerfi eiga ekki samskipti sín á milli. Ef farið er yfir landamærin til að versla eða þegar á að senda peninga í afmæli barnabarnsins í öðru norrænu ríki, þá virkar rafræna greiðslukerfið ekki. Sameiginlegt rafrænt greiðslukerfi á Norðurlöndum gæti gert okkur sem búum hér auðveldara fyrir, gagnast verslun milli landanna og verið skref í áttina að samþættu svæði á heimsmælikvarða.

Á Norðurlöndum búa í dag um það bil 27 milljónir manna, við erum öflugt svæði og sem heild erum við sterk á alþjóðavettvangi, en samstarfið er ekki sjálfsgefið. Framtíð samstarfsins veltur á því að við sem hér búum og störfum sjáum okkur hag í að gera hlutina saman og ekki hver í sínu horni.

Til þess að norrænt greiðslukerfi megi verða að veruleika þurfa í fyrsta lagi öll Norðurlöndin að styðja hugmyndina, í öðru lagi þarf að samræma löggjöf og þróa samstarf eftirlitsstofnana landanna. Markmiðið með greiðslukerfinu er að efla norrænt samstarf, en einnig – og ekki síst – auðvelda og skapa virðisauka fyrir okkur íbúa landanna.

Flokkahópur hægrimanna leggur því til að Norræna ráðherranefndin/ríkisstjórnir Norðurlandanna vinni að stofnun sameiginlegs rafræns greiðslukerfis á Norðurlöndum, auk þess sem Norræna ráðherranefndin/ríkisstjórnir Norðurlandanna vinni að því að öll Norðurlöndin styðji hugmyndina.

Norðurlöndum 20. október 2021

Atte Kaleva (saml)

Brigitte Klintskov Jerkel (Kf)

Cecilie Tenfjord-Toftby (M)

Hans Wallmark (M)

Helge Orten (H)

Lene Westgaard-Halle (H)

Vilhjálmur Árnason (Sj.)

Liv Kari Eskeland (H)

Maria Stockhaus (M)

Pål Jonson (M)

Tone Wilhelmsen Trøen (H)

Ville Kaunisto (saml)

Wille Rydman (saml)